

BAB V

KACINDEKAN, IMPLIKASI JEUNG RÉKOMÉNDASI

5.1 Kacindekan

Dumasar kana hasil analisis data paragraf jeung déskripsi data anu dipedar dina bab IV, aya tilu hal anu bisa dicindekkeun dina ieu panalungtikan anu patali jeung kohérénsi référénsial dina rubrik Carita Pondok majalah *Manglé*. Éta tilu hal téh nyaéta (1) wanda kohérénsi référénsial antiarkalimah; (2) dominasi wanda kohérénsi référénsial dina rubrik Carita Pondok majalah *Manglé*; jeung (3) babandingan paragraf nu ngandung kohérénsi référénsial jeung paragraf nu teu kohéren dina rubrik Carita Pondok majalah *Manglé*. Dumasar hasil analisis, jumlah data paragraf sakabéhna aya 447 data anu papasinganana dipedar ieu di handap.

- a. Kohérénsi référénsial sakabéhna aya dalapan wanda, anu masing-masing wanda miboga papasinganana deui. Aya sababaraha papasingan wanda kohérénsi référénsial anu kapanggih dina ieu panalungtikan diantarana tatali kausalitas *sabab-akibat* jeung tatali kausalitas *alesan-akibat*; tatali komparatif *ngupamakeun* jeung tatali komparatif *lalandian*; tatali parafratis; tatali implikatif *latar-inklusif* jeung tatali implikatif *latar-kacindekan*; tatali idéntifikatif; tatali aditif; tatali generalisasi *generik-spesifik* jeung tatali generalisasi *spesifik-generik*; tatali réultatif *sarana-hasil*; tatali réultatif *sarana-tujuan*; tatali réultatif *sarat-tujuan*; jeung tatali réultatif *anéksi-hasil*.
- b. Dominasi wanda kohérénsi référénsial anu pangréana nyaéta wanda kohérénsial référénsial parafratis anu jumlahna aya 128 data paragraf. Ieu hal disababkeun rubrik Carita Pondok kaasup kana wacana narasi anu ngajelaskeun kajadian atawa peristiwa boh sipatna nyata, atawa sipatna rékaan, anu hartina eusi wacana Carita Pondok aya pikeun ngajelaskeun bagéan wacana séjénna ku cara diparaphraseu ngagunakeun basa nu leuwih jéntré. Data anu pangsaeutikna nyaéta tatali réultatif *sarat-hasil* anu kapanggih 1 data paragraf. Wanda kohérénsi référénsial séjénna anu kapanggih nyaéta aya, tatali aditif 68 data paragraf, tatali implikatif *latar-inklusif* 57 data, tatali kausalitas *sabab-akibat* 38 data, tatali kausalitas *akibat-alesan* 28 data, tatali kausalitas *alesan-akibat* 27 data, tatali implikatif *latar-kacindekan* 22 data, tatali generalisasi *generik-*

spesifik 21 data, tatali komparatif *ngupamakeun* 14 data, tatali idéntifikatif 11 data, tatali résumatif *anéksi-hasil* 10 data, tatali résumatif *sarana-tujuan* 4 data, tatali résumatif *sarana-hasil* 4 data, tatali *komparatif lalandian* 2 data; jeung tatali generalisasi *spesifik-generik* 2 data.

- c. Babandingan paragraf nu ngandung kohérens référensial jeung paragraf nu teu kohéren dina rubrik Carita Pondok majalah *Manglé* kawilang gedé bébédaanana. Jumlah data paragraf anu ngandung kohérens référensial nyaéta aya 436 data paragraf, sedengkeun jumlah data paragraf anu teu kohéren nyaéta aya 11 data paragraf. Tina hasil analisis nu kasampak, bisa ogé dicindekkeun yén tingkat kohérensivitas rubrik Carita Pondok dina majalah *Manglé* geus kawilang alus. Tina tujuh belas carita pondok anu ditalungtik, aya salapan carita pondok nu dijeronan ngandung paragraf nu teu kohéren nyaéta carpon *Katurug Katutuh* (1 paragraf), *Nu Miang Dina Bayeungyang* (1 paragraf), *Murid Anyar* (1 paragraf), *Atuda Kumaha* (2 paragraf), *Nu Kungsi Kalangsu* (1 paragraf), *Mangsa Sasalad Nerekab* (2 paragraf), *Lock Of Love* (1 paragraf), *Ani Sobat Kuring* (1 paragraf), jeung *Jurigna Datang* (1 paragraf).

5.2 Implikasi

Dumasar kana hasil analisis jeung déskripsi anu dipedar saméméhna, implikasi tina ieu panalungtikan diantarana pikeun masarakat, ieu panalungtikan bisa ngajembaran pangaweruh masarakat hususna ngeunaan kohérens référensial anu aya dina wacana. Pikeun pangatik saperti dosén atawa guru, bisa nambahan référens pikeun panalungtikan satuluyna ngeunaan kabasaan, hususna ngeunaan kohérens référensial. Pikeun pamilon atikan, bisa dipaké pikeun référens panalungtikan, ngajembaran pangaweruh, sarta pikeun maluruh kabasaan utamana dina medar kohérens référensial.

5.3 Rékoméndasi

Dumasar kana hasil analisis jeung déskripsi data anu dipedar saméméhna, aya sawatara rékoméndasi anu patali jeung ieu panalungtikan, nyaéta 1) pikeun panalungtik bisa leuwih ngajembaran deui pangaweruh ngeunaan kabasaan jeung wacana; 2) ieu panalungtikan medar ngeunaan kohérens référensial dina rubrik

Carita Pondok majalah *Manglé* édisi bulan Séptémber 2021, bakal leuwih hadé saumpamana édisi anu ditalungtik leuwih loba; jeung 3) luyu jeung tiori nu dipaké, wanda kohérénsi nurutkeun Yayat Sudaryat dibagi jadi dua, aya kohérénsi référénsial jeung kohérénsi tékstual, bakal leuwih hadé upama kahareupna aya panalungtikan nu medar kohérénsi référénsial katut kohérénsi tékstualna.